



Walter Schlegel, il cumandant da la polizia chantunala.



Da la partida a la saramentaziun èn er stads divisunari Lucas Caduff (a san.) e colonel, Peter Baumgartner.



Roger Janett, il nov policist, flancà da sia madretscha Domenica Uehli (a san.) e da sia amia Leta Dietrich.



Segna tar la polizia chantunala per la scolaziun ed infurmaziun: Gion Batist Schmid da Riom.



La famiglia Tomaschett è vegnida per assister a la festa da brevetaziun da la figlia Alesandra Tomaschett.

FOTOS G. N. STGIER



Las novas policistas ed ils novs policists cun cusseglier guvernativ Christian Rathgeb (a san.) e Walter Schlegel, (2. da dretg), il cumandant da la polizia chantunala.

«Vus essas il maletg da la polizia»

Polizia chantunala dal Grischun: Saramentaziun

DA GION NUTEGN STGIER / ANR

■ La polizia chantunala dal Grischun ha duas novas policistas e trais novs policists. A la festa da brevetaziun venderdi avantmezdi in la sala dal cussegl grond a Cuira han ellas ed els prestà l'empermischun. Suenter ina scolaziun intensiva cumenzan ellas ed els immediat lur servetsch en il corp da polizia dal chantun. En in rom festiv èn duas aspirantas e trais aspirants vegnids saramentads tar policistas e policists.

A la festa èn sa participadas las confamigliars ed ils confamigliars da las brevetadas e dals brevetads sco er numerusas represchentantas e numerus represchentants da la politica, dal militar, da l'administraziun e d'organisaziuns partenarias. La festa da brevetaziun è vegnida enramada musicalmain – sco ch'igl è tradiziun – da la musica da la polizia dal Grischun.

«Be» tsching da 90 dels

Las duas novas commembras ed ils trais novs commembers dal corp avevan cumenzà lur scolaziun l'october 2015 a la scola da polizia da la Svizra orientala ad Amriswil. Ellas ed els tuts han reussì cun success l'examen professional federal il settember 2016. La proxima scola da polizia cumenza oz e quai cun 15 aspirants ed aspirantas da noss chantun. L'onni passà han 90 umens e dunnas da tuts chan-

tuns da la Svizra orientala cumenzà la scola da polizia ad Amriswil. Dal Grischun eran quai «be» tschintg. Il dumber grischun dals absolvents e da las absolventas da la scola da polizia è mintg'onni dependent dal dumber da policists che van en pensiun e da quels che midan professiun.

Colliaziuns impurtantas èn naschidas

Walter Schlegel ha evocà en ses discurs il mintgadi da scola en la scola da polizia da la Svizra orientala ad Amriswil: «Vus essas ids a scola ensemen cun vossas collegas e voss collegas d'auters corps da polizia. Da quai èn naschidas colliaziuns che vus na vulais betg manchar. Quai facilitescha er la lavur transcunfinala.» La finala adempleschia quai er in giavisch central dal concordat da polizia da la Svizra orientala, ha cumplettà Schlegel. El ha appellà da demussar ina buna tenuta er en situaziuns difficilas e da reagir en moda sincera e persuadenta. L'agir e la demananza da las policistas e dals policists furmian decisivamain il maletg da la polizia, di Schlegel.

Sur la bandiera sbassada han las novas commembras ed ils novs commembers dal corp respondi: «Jau empermet.»

«Ina professiun tut speziala»

Il president da la regenza Christian Rathgeb ha accentuà en sia allocuziun la professiun da policista u policist sco profes-

siun tut speziala cun obligaziuns e dretgs spezial. Il schef dal departament da giustia, segirezza e sanadad ha renvià a las retschertgas, da las qualas resulta mintga onni che la polizia saja l'instituziun statale en Svizra, envers la quala la populaziun haja la pli gronda fidanza. «Nus pudain mantegnair questa fidanza mo sch'i regia ina cultura correspondent en il corps», ha ditg Rathgeb ed ha cumplettà: «Jau spetg che vus ageschias cleramain, consequentamain, e nua ch'igl è necessari cun direzza, dentant adina correctamain e loialmain envers voss superiors.» Ina tenuta professiunala signifitgia dentant er da scuntrar tuts cun dignitad umana e da tractar tuts cun egualitad giuridica, ha accentuà Rathgeb.

Novs polizists dal Grischun e lur lieus da staziunament

Las novas policistas ed ils novs policists da la polizia chantunala dal Grischun cun lur emprims lieus da staziunament: Alexandra Tomaschett, Trun, post da polizia Martina Andreas Pilatti, Schlarigna, post da polizia Samedan Samantha Lippuner, Favugn, post da polizia Silvaplauna Adriano Caviezel, Bravuogn, basa da la polizia da traffic Silvaplauna Roger Janett, Valsort, basa da la polizia da traffic Silvaplauna



Cun tensiun taidlan ils protagonists da la saramentaziun ils blers peds da la festa da brevetaziun.